

69. Grenitz, anno etc. lxxvij^o vmb Pffingstenn, hot man gegrenitzt vnd gereynt mit den Pentzkerenn Im Gehege, vnnnd ist mit enen gantz eyns worden. Vnnnd dasselbige Jor, hot man eynen Grabenn follend vmb gehege gezcogenn das man forth zcu ewigen zceiten vermergkenn khan, wy dy Luchternn vnnnd grentze gehen sollen.

Dor zcu sein gegeben Urbann Schelner, Nicloss Girnig, Wentzel Emrich, Hans Hancke, Mertenn Heidenreitter vnnnd ander mehr. Vnd uff den Grebenn gegeben, vor ein stücke verdinget. Am Sonnobende noch Protasij anno vts. vij mark gr. (20/6 h)

Eodem anno Seifrid Goswinn Bürgermeister vnnnd Mr. Johann Frawenburg Stadschreiber.

70. Hogers Werde, Anno etc. lxxvij^o Ist Hogerswerde abermols von Melchior von Lobenn berandt, noch entpfelung konig Mathie zcu Hungern, Behem etc. konige. Vnnnd dy Lusatzer sein mit em do vor gezcogenn, vnnnd das genotiget circa festum S. Vitj. Vnnnd Melchior von Loben hot vnns do vor geruffen vnnnd geboten, nach gebot vnnsers g. h. k.

Sunder land vnnnd Stette, haben sich uffgehaldenn, durch redliche gute vrsache. Vnnnd Herr Jaroslaw von Sternberg hot geschickt, vnnnd Melchiorn eynen Logenern geheisen. Do sich Melchior stolzigh verantworrhath. Actum vts.

71. Weit. Anno etc. lxxvij vmb den tag sandt Egidij, haben die Fürsten von Sachsenn, uff des Herrn Bischoffs von Breslaw anbringen, zcu vnserm g. h. K. widder gefertiget, denn Herrn Bischoff von Missen, bischoff Johannsen, vorgebant doctor Wisbach vnd Herrn Henrichen von Miltitz Ritters hauptman vom Saghan, des Weits halbenn. Vnnnd was sihe dorjnn vorhandelnn werdenn, stehet zu Got.

Got gebe vnnnd meyner heiligen Wunsch, das es gut werde, adder wir armen Görlitzer werdenn gar kaltt stehnn.

72. Tuchmecher. Anno domini etc. lxxvij^o, am freitag noch Lampertj sein die eldistenn der Tuchmecher vnd Sneidermeister besandtt. Vnnnd ist vom Rathe gesagt: Das fort nyment eyngerley Tuch sneiden solle, widder Bürgermeister, widder Sneider, widder ander Leute, dy Ele vnder v. gr., sonder dy Ele zcu fünff gr., vnnnd darober mochte sihe eyn yder sneidenn.

Alleyne die Tuchmacher mochten Gorlitsch Tuch vnnder v. gr. sneidenn.

Vnnnd diss solle so stehenn vnnnd gehaldenn werdenn vffs Raths wolgefallen, Wenn der Rath ein anders jrkennen werde, zcu hoen adder nyddern, adder gantz abe zcuthun, sall zcum Rathe stehenn.

Dy zeit ist Mgr. Johann Frawenburg Bürgermeister, Seyfrid Goswinn vnnnd Hanns Bebirstain Cammerer gewest.

Tuchmecher do by Wentzel Wayman, Hanns Sneuperlein, Andres Brendel vnnnd Steffan Meltzer.

Sneidermeister Hans Herman vnnnd meister Jost.

Am selbigen Tage ist enen des warffs halben zcugesagt, das sich dy Bürger des zcu kouffen vnnnd verkouffen eyn zeit mesigenn